



Sažetak aktivnosti Općine Kakanj u 2013. godini

Izvršena stabilizacija poslovanja

Tokom 2013. godine Općina Kakanj je uspjela sanirati naslijeđene budžetske probleme iz 2012. godine, te izvršiti stabilizaciju poslovanja, uskladiti trošenje sredstava sa prilivom prihoda, te zaustaviti trend poslovanja sa deficitom.

Najčešći problemi sa kojima se u 2013. godini suočavala Općina Kakanj ogledaju se u smanjenom prilivu sredstava sa viših nivoa vlasti, smanjenju priliva pripadajućeg dijela PDV-a, te izostavljanju Kaknja u raspodjeli sredstava od GSM licence.

Iz domene finansija Općine Kakanj izdvajamo nekoliko najvažnijih činjenica. Tokom 2013. godine donesena je Odluka o privremenom finansiranju za prva tri mjeseca, a potom je usvojen i Budžet Općine Kakanj za 2013. godinu.

Donesene su i izmjene i dopune Budžeta Općine Kakanj za 2013. godinu, a potom je blagovremeno pripremljen nacrt, provedena javna rasprava, te pripremljen prijedlog Budžeta Općine Kakanj za 2014. godinu. Ukoliko Općinsko vijeće na sjednici koja će biti održana do kraja tekuće godine usvoji Budžet za 2014. godinu Općina Kakanj će biti jedna od rijetkih općina koje novu godinu počinju sa usvojenim najznačajnijim dokumentom- Budžetom, bez potreba za donošenjem Odluke o privremenom finansiranju. Sve ovo rezultat je pravovremenog planiranja i reagiranja, finansijske discipline, vrijednog rada, transparentnosti, racionalnog trošenja budžetskih sredstava i sistemskog pristupa.

Tokom 2013. godine u Općini Kakanj uvedeno je elektronsko bankarstvo čime su u značajnoj mjeri smanjeni troškovi platnog prometa.

Nakon nekoliko proteklih godina neobjavljivanja detalja o utrošku sredstava budžetske rezerve od strane prethodnog načelnika, 2013. godina će biti zapamćena po podnošenju detaljnog izvještaja aktuelnog načelnika o utrošku tekuće budžetske rezerve što je odraz opće opredijeljenosti da se osigura puna transparentnost utroška budžetskog novca.

U vremenu opće krize Kakanj je svijetli primjer

Novi obrti u Kaknju

U vremenu opće krize u BiH, u beznadežnoj situaciji u kojoj veliki broj građana BiH svakodnevno ostaje bez posla, u periodu učestalih štrajkova i protesta, svaki svijetli primjer zaslužuje poseban respekt. Kakanj je jedna od rijetkih sredina u BiH koja bilježi porast registriranih obrta i srodnih djelatnosti. Tokom 2013. godine Služba za poduzetništvo Općine Kakanj izdala je 18 rješenja o pokretanju obrta, 36 rješenja o obavljanju poljoprivredne djelatnosti, 4 odobrenja za javni prevoz tereta, jedno odobrenje za taksi prevoz, te 15 rješenja o prevozu za vlastite potrebe.

Pozitivan trend rasta poduzetništva u Kaknju je rezultat brojnih koraka koje je poduzela Općina Kakanj s ciljem stvaranja povoljnog ambijenta za investiranje u Kaknju i

otvaranje novih radnih mjesta, te širokog spektra pogodnosti koje su omogućene investitorima.

Kakanj – sredina prepoznatljiva po pogodnostima za investicije

Kvadratni metar zemljišta 1 KM

Nakon okončane zakonske procedure Općina Kakanj je, po cijeni od 1 KM za kvadratni metar zemljišta, izvršila dodjelu lokacija Poduzetničke zone "Vrtlište" na kojima će investitori graditi proizvodne i druge objekte. Trenutno je aktuelna faza podnošenja zahtjeva za izdavanje, te izdavanje urbanističkih saglasnosti za izgradnju, tako da se uskoro može očekivati početak izgradnje poslovnih objekata.

Općina Kakanj je nastavila aktivnosti na pripremi novih lokacija za investitore čime se osigurava kontinuitet dobre praksa jačanja poduzetništva kroz dodjelu zemljišta zainteresiranim investitorima po cijeni od 1 KM za kvadratni metar zemljišta.

Izvršena je i dodjela parcela u Ričici u svrhu izgradnje proizvodnog objekta i dodjela parcele kod Doma zdravlja u svrhu izgradnje stambeno-poslovnog objekta.

Vrijedi izdvojiti i izradu idejnog urbanističkog rješenja lokaliteta Stara jama u Kaknju.

Idejno rješenje je izrađeno kako bi Općina Kakanj bila spremna, u momentu kada RMU Kakanj vrati zemljište na lokalitetu Stara jama, investitorima ponuditi zemljište za izgradnju određenih sadržaja za koje postoji potreba u lokalnoj zajednici.

Posebnu pažnju zaslužuju i aktivnosti na pripremi lokacija i izgradnji zgrada za stambeno zbrinjavanje Roma. Radi se o problemu kojeg decenijama niko nikad nije ni pokušao rješavati. U toku su završni radovi na izgradnji zgrade sa ukupno 12 stanova u koje će useliti porodice Roma iz Kaknja. U 10 stambenih jedinica nakon izgradnje će useliti 10 porodica - korisnika projekta stambenog zbrinjavanja Roma koji su ostvarili ovo pravo kroz proceduru javnog poziva.

U preostale dvije stambene jedinice uselit će porodice koje će u sljedećoj fazi projekta biti iseljene sa lokacija na kojima trenutno žive kako bi se na tim lokacijama gradili novi stambeni objekti za zbrinjavanje Roma.

Useljavanjem u nove objekte stvorili bi se uslovi da se stare i trošne bespravno izgrađene kuće Roma uklone.

Radove finansira Ministarstvo za ljudska prava i izbjeglice BiH u iznosu od 300.000 KM, dok je iznos od 63.216 KM obezbjedila Općina Kakanj.

Općina Kakanj je dobila i nova sredstva. Za izgradnju nove 4 stambene jedinice za romske porodice u Kaknju, izrade urbanističkog plana naselja Varda, uređenje lokacije i infrastrukturu Ministarstvo je izdvojilo 190.000 KM, dok će učešće Općine Kakanj biti 100.000 KM.

Kakanj – prepoznatljiv po mjerama za pokretanje i razvoj poduzetništva

Pozivamo investitore da ulažu u Kakanju

Posebnu pažnju zaslužuje širok spektar pogodnosti koje su omogućene investitorima.

Za gradnju objekata investitorima pripada poticaj u vidu povrata novčanih sredstava od naknade koja se obračunava za rentu i naknade za uređenje gradskog građevinskog zemljišta.

Osim toga, pravo na poticaj u vidu oslobađanja od plaćanja naknade za korištenje gradskog građevinskog zemljišta i komunalne naknade stiče investitor za parcelu na kojoj gradi objekat u periodu od 5 godina od dana pribavljanja odobrenja za upotrebu objekta.

Odlukom o općinskim taksama na istaknutu firmu određeno je i umanjenje visine taksi u većini djelatnosti, te oslobađanje pojedinih taksenih obveznika u potpunosti ili za određeni period.

Osim toga, takseni obveznici koji su počeli sa obavljanjem registrirane djelatnosti u toku tekuće godine oslobađaju se plaćanja takse na istaknutu firmu za tu godinu.

Pored ovog oslobađanja, od obaveze plaćanja takse oslobođena su pravna i fizička lica koja registriraju proizvodne djelatnosti, za prvu godinu 100 %, a za drugu godinu 50 % od ukupnog iznosa taksene obaveze.

Jačanje poduzetništva u Kakanju

Odlučna borba protiv nezaposlenosti

Općina Kakanj realizira brojne aktivnosti koje su usmjerene na jačanje poduzetništva i nova zapošljavanja.

U svrhu razvoja poduzetništva i obrta iz Budžeta Općine Kakanj za 2013. godinu izdvojeno je 90.000 KM. Ova sredstva su opredjeljena:

- za realizaciju projekta "Pokreni svoj posao u Kakanju" koji nezaposlenim osobama, kroz nekoliko ciklusa u toku godine, omogućava obuku u pisanju poslovnih planova, nagrađivanje najkvalitetnijih planova inicijalnim sredstvima za osnivanje i početak rada (prvorangirani 6.000,00 KM; drugorangirani 5.000,00; trećerangirani 4.000,) te pomoć pri registraciji firmi,

Kroz ovaj projekat osnovano je novih 6 firmi u Kakanju, a zaposlenje će dobiti 10 osoba.

- za refundaciju troškova osnivanja obrtničkih radnji (osim trgovina i ugostiteljskih radnji) i dijela troškova osnivanja preduzeća (izdvojeno 40.000 KM);
- za sufinansiranje dijela troškova zakupa poslovnog prostora obrtničkim radnjama (osim trgovina i ugostiteljskih radnji) i preduzećima "d.o.o." koji registrišu djelatnost i firmu na području općine Kakanj u 2013. godini (izdvojeno 15.000 KM).

Za ovu svrhu u 2012. godini nije bilo izdvajanja novca iz Budžeta.

U saradnji sa Njemačkom nevladinom organizacijom "Help" Općina Kakanj je realizirala prvu fazu projekta pomoći pokretanju i jačanju poduzetništva. Vrijednost prve faze projekta iznosila je 120.000 KM (donirani motokultivatori, platenici, steone krave, oprema za zanatsku djelatnost, košnice sa pčelama...). Nakon realizacije prve faze potpisan je ugovor o nastavku projekta u vrijednosti od 200.000 KM. Projekat će u drugoj fazi pomoći ukupno 40 korisnika u Kaknju.

U Budžetu Općine Kakanj osigurana su i sredstva za podršku poljoprivrednoj proizvodnji. U svrhu poticaja poljoprivrednoj proizvodnji iz Budžeta Općine Kakanj za 2013. godinu izdvojeno je 140.000 KM što je za 50.000 KM veći iznos u odnosu na izdvajanja u 2012. godini.

Akcentiramo još jednu dobru praksu zabilježenu u Kaknju. Naime, sa temeljnim opredjeljenjem da je svako radno mjesto bitno i da kontinuirano treba biti na usluzi privredi, u Općini Kakanj se svaka tri mjeseca održavaju sastanci sa predstavnicima velikih firmi, poduzetnicima i ugostiteljima gdje se razmatraju aktuelna pitanja i zajedno definiraju smjernice za razvoj privrede.

U Općini Kakanj je imenovan i Tim za otklanjanje administrativnih barijera.

Kakanj - jedna od rijetkih općina u kojima opća kriza nije zaustavila razvoj infrastrukture

3.500.000 KM ulaganja

Kakanj je dosanjao san, temeljito je obnovljen Dom kulture; Uspostavljen istosmjerni saobraćaj u gradskoj jezgri

Premda viši nivoi vlasti ne isplaćuju Općini Kakanj prihode u iznosu koji zakonski pripada našem gradu (npr. prihod od PDV-a, a ni sredstava za puteve od GSM licence nema, i sl), ipak se u Kaknju uspijeva pronalaziti modalitete da se obnova i izgradnja ne zaustave. To je rezultat predanog rada, racionalnog usmjeravanja i trošenja budžetskog novca, dobrog pristupa investitorima, uvođenja stimulativnih mjera za razvoj poduzetništva, kontinuiranog dijaloga sa privrednicima, mjesnim zajednicama, udruženjima građana...

Tokom 2013. godine u Kaknju su realizirana ulaganja u cestovnu infrastrukturu ukupne vrijednosti 673.451, 68 KM.

Za realizaciju ostalih projekata koji se odnose na izgradnju vodovoda i kanalizacionih mreža utrošeno je 267.082,62 KM, a u toku je realizacija projekata istog karaktera ukupne vrijednosti 120.000 KM tako da ukupna ulaganja u ovom segmentu iznose 387.082,62 KM.

Osim toga, realizirano je još nekoliko projekata poput toplifikacije, izgradnje rasvjete i sl, ukupne vrijednosti 422.383,41 KM, a u toku je i realizacija projekta izgradnje Društvenog doma u Čatićima, te dva stambena objekta sa socijalno ugrožene Rome. Zbir vrijednosti ova dva projekta iznosi 557.548,62 KM.

U konačnici, zbir ulaganja u cestovnu infrastrukturu i ulaganja u ostale projekte iznosi 2.040.466,33 KM.

Ako se ovoj cifri pridoda cijena radova na izgradnji Doma kulture koji su imali vrijednost od oko 1.200.000 KM, te još neki drugi projekti poput obnove kuglane i dr, dolazi se do sume od oko 3.500.000 KM ulaganja u infrastrukturu.

Značajna su i izdvajanja za ljetno i zimsko održavanje puteva. Planom održavanja lokalnih cesta na području Kaknja planiran je iznos od 370.540 KM.

Projekat obnove Doma kulture je jedan od najvažnijih projekata realiziranih tokom 2013. godine. Radi se o objektu koji se prije dvije godine zbog oronulosti srušio pod teretom velikog snježnog pokrivača.

2013. godinu u Kaknju obilježilo je i uvođenje istosmjernog saobraćaja u gradskoj zoni.

Radi se o projektu koji je donio pozitivne saobraćajne, razvojne i ekološke efekte.

Segment zaštite životne sredine zaslužuje posebnu pažnju

Milionska ulaganja u zaštitu okoline

U skladu sa temeljnim opredjeljenjem da se intenzivno i kontinuirano radi na unapređenju ekološke slike Kaknja, Općina Kakanj tokom 2013. godine realizira nekoliko ekoloških projekata čija je ukupna vrijednost 2.152.000,00 KM.

Odlučni smo u namjeri da osiguramo visok nivo komunalne higijene na području cijele općine. Svjesni smo činjenice da niko neće doći da vrši zbrinjavanje otpada u našem zavičaju. To trebamo uraditi mi. Naša ideja vodilja se ogleda u našoj želji da cijeli prostor općine Kakanj bude čist. Stoga smo izdvojili 400.000 KM za projekat uspostave procesa integralnog upravljanja otpadom na području općine Kakanj. Od ovog iznosa, 70.000 KM se odnosi na subvencioniranje odvoza smeća iz najudaljenijih područja.

Ovim projektom je planirano da uspostava procesa integralnog upravljanja otpadom obuhvati novih 11 mjesnih zajednica, uz 19 mjesnih zajednica u kojima već postoji organizirani odvoz smeća. Tako će se postojeći sistem prikupljanja otpada, koji pokriva 48 % od ukupnog broja stanovnika Kaknja, proširiti, te će pokrivati 85 % od ukupnog broja stanovnika.

Planirano je da se narednih godina još povećava opseg odvoza otpada i da u konačnici obuhvati svih 37 kakanjskih mjesnih zajednica.

U toku je tenderska procedura izbora izvođača radova na proširenju sistema daljinskog grijanja u MZ Kakanj II. Za realizaciju projekta predviđen je iznos od 1.000.000,00 KM. Cilj projekta je smanjiti zagađenje uzrokovano radom mini-kotlovnica.

U realizaciju ovog projekta već je uloženo 1.500.000 KM. Projekat je nekoliko godina čekao na dovršetak, a evo ove godine Općina Kakanj je učinila odlučne korake kako bi se završili radovi.

Priča o toplifikaciji se ne završava sa ovim projektom.

Završene su aktivnosti na širenju mreže daljinskog grijanja na području MZ Papratnica, a u toku su aktivnosti na izradi projektno-tehničke dokumentacije za proširenje sistema daljinskog grijanja u nekoliko naselja. Za poslove projektovanja izdvojeno je 250.000,00 KM.

Općina Kakanj posebnu pažnju posvećuje uređenju i zaštiti čovjekove okoline. Osim kontinuiranih aktivnosti na uređenju zelenih površina, izletišta i ski-staza na Ponijerima, ove godine smo realizirali i projekat čišćenja obala rijeke Bosne.

U skladu sa činjenicom da je potpisnica sporazuma "Covenant of Mayors" koji znači obavezu ostvarivanja ciljeva energetske politike Evropske unije u smislu redukcije emisije CO2 kroz povećanu energetska efikasnost, čistiju proizvodnju i korištenje energije, Općina Kakanj je započela sa aktivnostima na provedbi zamisli pomenutog sporazuma.

Završene su aktivnosti na izradi Održivog energetskeg akcionog plana (Sustainable Energy Action Plan – SEAP). Pomoć pri izradi SEAP-a Općini Kakanj pružila je Njemačka organizacija za razvojnu saradnju "Deutsche Gesellschaft für Internationale Zusammenarbeit" (GIZ).

U toku je i izrada Lokalnog ekološko-zdravstvenog akcionog plana.

Općina Kakanj realizira i druge ekološke aktivnosti. U toku je izgradnja biciklističke staze kroz gradsku jezgru dužine 945 m. Bit će to poklon preduzeća "Trgošped" građanima Kakanja. Izgradnjom staze bit će osigurani uslovi za smanjenje korištenja automobila u gradskoj zoni što će imati značajne pozitivne ekološke efekte.

LED rasvjeta

Počele aktivnosti na mjerenju učinka

U skladu sa opredjeljenjem da se kontinuirano radi na modernizaciji i širenju mreže javne rasvjete, uz težnju da se ugradnjom ekonomičnih rasvjetnih tijela umanje gotovo polumilionski godišnji računi za javnu rasvjetu, Općina Kakanj započinje aktivnosti na testiranju učinaka savremene LED rasvjete.

Faza analize učinaka podrazumijeva realizaciju pilot-projekata instaliranja LED rasvjete na određenim lokacijama. Prvi pilot-projekt već je započeo instaliranjem 19 rasvjetnih tijela na području Čatića (Rampa). Umjesto 12 klasičnih rasvjetnih tijela snage 150 W postavljeno je 12 LED svjetiljki snage 30 W. Izvršena je i zamjena 7 svjetiljki snage 250 W LED svjetiljkama snage 80 W. Premda se radi o svjetiljkama koje se značajno razlikuju u snazi, efekat osvjetljenja bi trebao biti isti ili čak bolji sa LED sistemom, a potrošnja električne energije bi se trebala značajno smanjiti.

Nakon dvomjesečnog praćenja učinaka LED rasvjete i postignutih ušteda, Općina Kakanj će raspolagati relevantnim pokazateljima na osnovu kojih će biti moguće definirati dalje smjernice u smislu raspisivanja tendera za nabavku i ugradnju LED rasvjete na području općine Kakanj.

Civilna zaštita

U svakom momentu na usluzi građanima

U 2013. godini Profesionalna vatrogasna jedinica Kakanj je imala 216 intervencija. U 14 slučajeva radilo se o požaru na stambenim objektima, u dva navrata radilo se o požaru na pomoćnim objektima, zabilježeno je 35 šumskih požara, 33 intervencije su se odnosile na poplave i saobraćajne nesreće, 91 intervencija se odnosila na otključavanje stanova, sapiranje, prevoz vode itd, u 41 slučaju radilo se o zapaljenom sijenu, kontejneru ili gumi.

U odnosu na 2012. godinu broj intervencija je smanjen sa 522 na 216 što je, između ostalog, rezultat preventivnih aktivnosti, medijskog oglašavanja i apeliranja, porasta stepena svijesti stanovništva o opasnostima i sl.

Tokom 2013. godine vršen je prevoz vode u naselja koja u sušnom periodu nemaju dovoljne količine vode (Živalji, Slapnica, Pavlovići, Koprivnica, Crnač, Gora, Ričica).

Ostvarena je zapažena saradnja sa Općinskom organizacijom Crvenog križa, te Udruženjem radioamatera.

U 2013. godini Služba civilne zaštite intervenirala je u 6 navrata usljed pojave poplave u naseljima Malješ, Brnj, Viduša i Tršće. Jedna intervencija se odnosila na čišćenje odrona na putu Kondžilo-Bukovina, dok se u jednom slučaju radilo o uklanjanju urušenog objekta u ulici 27. jula.

U cilju odvodnje akumuliranih voda, u Vukanovićima su izvršene sve pripreme za izradu drenažnog nasipa, a radovi će biti izvedeni kada to dozvole vremenske prilike.

U okviru aktivnosti na sanaciji klizišta u naselju Slapna Gora Rudarski institut Tuzla izradio je stručno mišljenje.

U Zagrađu je izvršena sanacija propusta potoka u cilju sprečavanja daljih oštećenja puta.

Sve je spremno za sanaciju klizišta Laze. Provedena je procedura javne nabavke, izabran je izvođač radova i nadzor, a radovi će početi kada to dozvole vremenske prilike.

Izvršena je sanacija podzemnih voda u Malješu.

Kakanj – grad sporta

Obnovljena kuglana

U Budžetu Općine Kakanj za 2013. godinu izdvojeno je 400.000 KM za sport što je veliko povećanje u odnosu na 2012. godinu kada je za sport izdvojeno 260.000 KM. Osim sportskih klubova, Općina Kakanj je podržala i nastupe uspješnih sportista iz Kaknja na međunarodnim takmičenjima.

U okviru aktivnosti na rekonstrukciji sportske infrastrukture posebno je važna obnova kuglane i ugradnja savremenih kuglaških staza. Nakon dugog iščekivanja i treniranja u Vogošći, kakanjski kuglaši su se vratili u svoj kuglaški dom. U toku su i aktivnosti na pripremi za korištenje sportske sale na posljednjoj etaži objekta CC1 (sportska sala je u vlasništvu Općine Kakanj).

Kulturno-sportska manifestacija „Kakanjski dani“

Pohvale za kvalitet sadržaja

Protekla godina obilježena je posve novom i kvalitetnijom organizacijom Kulturno-sportske manifestacije „Kakanjski dani“. Kakanj je 4 dana bio u žiži interesiranja lokalne i šire javnosti, a organizacija i kvalitet sadržaja su zadobili simpatije i pohvale građana.

Tokom 2013. godine, svi značajni datumi iz prošlosti Kaknja i BiH su dostojanstveno obilježeni, Općina je podržala odlazak djece na Kid's festival u Sarajevo, organiziran je doček Nove 2013. godine...

U Kaknju je upriličeno centralno obilježavanje Dana Armije R BiH za Zeničko-dobojski kanton, te centralna svečanost obilježavanja Dana policije ZDK.

Obrazovanje u Kaknju

Izvršene sve obaveze prema školarcima

U svrhu sufinansiranja prevoza za 298 učenika srednjih škola i 30 studenata u školskoj/akademske 2012/2013. godini u Budžetu Općine Kakanj opredijeljen je iznos

od 215.000 KM. U školskoj/akademskoj 2013/2014. godini povlastice za prevoz koristi ukupno 325 učenika i studenata.

Općina Kakanj plaća troškove prevoza za učenike srednjih škola i studente u iznosu od 100 % i 50%, ovisno od kategorije kojoj učenik pripada.

Dok je sufinansiranje prevoza za srednjoškolce u nadležnosti općina, za finansiranje prevoza učenika osnovnih škola nadležan je ZDK.

U segmentu poslova obezbjeđenja prevoza učenika i studenata, 2013. godinu obilježio je problem osiguranja prevoza učenika iz Karaulskog Polja do škola u Kaknju, obzirom na saobraćajnu ugroženost stanovnika ovog naselja nakon što je regionalni saobraćaj preusmjeren na neuslovnu saobraćajnicu kroz ovo naselje.

Dok je Općina Kakanj, u skladu sa svojim nadležnostima, obezbjedila i sufinansirala prevoz srednjoškolaca iz ovog naselja, Ministarstvo za obrazovanje, nauku, kulturu i sport ZDK je odbilo to isto učiniti za učenike osnovnih škola navodeći "da se bilo kakva dodatna zahvatanja potrebnih finansijskih sredstava moraju blagovremeno planirati, odnosno osigurati u Budžetu Kantona".

2013. godinu obilježilo je i pokretanje aktivnosti na formiranju područnog odjeljenja Osnovne muzičke škole u Kaknju, prijem u uredu načelnika za pobjednike na školskim takmičenjima (uz nagrade), prijem za maturante i diplomante – djecu šehida i poginulih boraca...

Socijalna zaštita

Dokazana briga o svim članovima zajednice

Putem Centra za socijalni rad Kakanj realizirana su značajna novčana sredstva Budžeta Općine Kakanj za stalnu socijalnu pomoć i druge oblike pomoći. Općina Kakanj je jedina od nekoliko općina Centralne Bosne koja je izvršila svoje obaveze prema Dnevnom centru za djecu i odrasle s posebnim potrebama u Dobrinju (Visoko) koji brine o pomenutoj populaciji sa područja nekoliko općina. O ovoj temi je bilo riječi u izvještajima medija.

Općina Kakanj je iznosom od 10.000 KM finansirala projekte udruženja nacionalnih manjina, a sufinansirala je i projekat „Zbrinjavanje žrtava nasilja u porodici“ kojeg realizira „Medica“ Zenica.

Inspeksijski poslovi

Borba protiv bespravne gradnje

Nakon decenija izbjegavanja suočavanja sa problemima bespravne gradnje, 2013. godinu u Kaknju obilježile su aktivnosti na uvođenju reda u oblasti gradnje. U proteklih nekoliko mjeseci u gradskoj jezgri Kaknja, po nalogu općinske inspekcije, izvršeno je

uklanjanje 36 bespravno izgrađenih i postavljenih garaža, dva kioska, te nekoliko drugih bespravno postavljenih predmeta (reklamni pano i sl).

Jasno je da bespravna gradnja postoji u značajnoj mjeri, no treba znati da je ove nagomilane probleme nemoguće riješiti u kratkom periodu. No, postoji odlučnost i sistemski pristup. Problem se rješava kroz legalizaciju bespravno izgrađenih objekata tamo gdje je moguća legalizacija u skladu sa zakonskim propisima, rušenjem objekata koje nije moguće legalizirati, te izgradnjom stambenih objekata za socijalno ugrožene Rome uz pomoć Ministarstva za ljudska prava i izbjeglice BiH.

Decenijama niko nikad nije ni pokušao rješavati problem bespravne gradnje, niti problem stambenog zbrinjavanja Roma.

I onda kada je bilo sporadičnih i rijetkih zahvata koji su se odnosili na ove probleme, sve se završavalo na pričama, prebacivanju nadležnosti i ostavljanju problema nekome drugom.

Posao nije lagan, niti je moguće sve probleme riješiti u kratkom roku, ali nema više bježanja od problema.

U 2013. godini općinski inspektori su preduzeli 4.536 radnji (razgovori sa strankama, uzimanje izvjava, sačinjavanje rješenja...), izvršili su 756 inspekcijskih pregleda, 382 kontrole, te 623 preventivne i represivne mjere.

Boračko-invalidska zaštita

Redovno izvršavanje obaveza

U Službi za boračko-invalidsku zaštitu, raseljena lica, izbjeglice i povratnike tokom 2013. godine obrađen je 6.081 predmet.

Zaprimljen je i obrađen 2.241 zahtjev za jednokratnu novčanu pomoć pripadnicima boračkih kategorija, te je za ovu svrhu isplaćeno 96.515 KM. Pitanja boraca su u nadležnosti ZDK i F BiH, no Općina Kakanj je ipak, cijeneći položaj ove populacije, izdvojila značajan iznos kako bi se pomoglo ovoj populaciji.

U svrhu plaćanja sredstava za rad boračkih organizacija isplaćeno je 60.968,65 KM, dok je za obilježavanje značajnih datuma utrošeno 12.743,24 KM.

U svrhu podrške povratnicima, u Budžetu Općine Kakanj za 2013. godinu planiran je iznos od 50.000 KM. U 2013. godini pozitivno je riješeno 29 zahtjeva za pomoć povratnicima.

U djelokrugu boračko-invalidske zaštite vrijedi izdvojiti pomoć Općine Kakanj pri formiranju Saveza udruženja boračkih organizacija općine Kakanj u čiji sastav je ušlo 10 boračkih udruženja.

Uz pomoć Općine Kakanj, Savez udruženja boračkih organizacija općine Kakanj izvršio je adaptaciju svojih prostorija koje se nalaze u ulici Alije Izetbegovića (soliter 1) čime su u značajnoj mjeri poboljšani uslovi za rad Saveza i sveopća nastojanja da se osigura što bolji materijalni i socijalni status boračkih populacija.

Tokom cijele godine prisutan je problem kašnjenja Ministarstva za boračka pitanja ZDK u izvršavanju svojih obaveza prema boračkim kategorijama (pomoć zbog teške ekonomske situacije, pomoć za liječenje, troškovi dženaze/sahrane...).

Kontinuirano unapređenje kvalitete pružanju usluga građanima

Izdavanje izvoda trajnog karaktera

Tokom 2013. godine u Kaknju su obavljena 232 vjenčanja. U Centru za pružanje usluga građanima (šalter-sala) izvršene su 59.543 ovjere potpisa, prepisa i rukopisa. Kroz Djelovodnik predmeta i akata provedeno je 4.915 predmeta.

Primljeno je 65.000 stranaka.

2013. godina će biti zapamćena po uvođenju trajnih izvoda iz matičnih knjiga. Izdavanje izvoda iz matičnih knjiga bez roka važenja počelo je 17. juna 2013. godine. Dok su iz nekih općina stizale vijesti o problemima i obustavama izdavanja izvoda trajnog karaktera, u Općini Kakanj izdavanje izvoda se odvijalo bez poteškoća. To je rezultat odlične informatičke pripremljenosti, vrhunske spremnosti službenika, ranije izvršenog elektronskog upisa podataka iz matičnih knjiga u baze podataka, te ranije realiziranog uvezivanja putem internet-mreže kakanjskih matičnih ureda u Brnjicu, Kraljevoj Sutjesci i Bilješevu sa Centrom za pružanje usluga u Kaknju.

Transparentnost i komunikacija sa građanima

Uspostavljeni modaliteti dvosmjerne komunikacije

Stepen ostvarene demokratičnosti u jednoj zajednici mjeri se, između ostalog, i učešćem građana u procesu donošenja odluka koje su od općeg interesa. Kako bismo osigurali osnovne pretpostavke za uključivanje građana u ove procese, u skladu sa principom "Informiran - educiran - aktivan", trudili smo se u proteklom periodu da kontinuirano izvještavamo o svim aktivnostima općinskog organa uprave, a uspostavljali smo i alate dvosmjerne komunikacije kako bi se čuo glas građana. Službena web-stranica je redovno ažurirana, komunicirali smo sa građanima putem Facebook-a, svakodnevno smo na e-mail adrese medija u BiH slali informacije iz Kaknja, svakodnevno smo bili na usluzi novinarima...

Općina Kakanj će nastaviti jačati transparentnost rada i razvijanje participativnih mehanizama kako bi se građani što više uključivali u procese donošenja odluka koje su od općeg interesa.

Općina Kakanj u partnerstvu sa Međunarodnom finansijskom korporacijom (IFC) i Ministarstvom za ekonomske poslove Švicarske, organizirala je besplatno finansijsko i pravno savjetovanje za prezadužene osobe.

Savjetovanje se održava utorkom i četvrtkom, od 13.30 do 15.30 sati, u maloj sali Općine Kakanj.

Savjetovanje je namijenjeno osobama koje ne mogu vraćati svoje kredite, koje imaju dilemu kako se ponašati kada finansijska institucija promijeni uslove kreditnog ugovora, osobe koje ne znaju šta činiti kada dužnik ne otplaćuje dugovanja pa to mora činiti žirant...

Nadzorni audit švicarske certifikacijske kuće SGS potvrdio

Općina Kakanj nosilac prestižnog standarda ISO 9001:2008

Švicarska certifikacijska kuća SGS (Société Générale de Surveillance SA), sa sjedištem u Ženevi, izvršila je u septembru 2013. godine, putem svog sarajevskog predstavništva, nadzorni audit u Općini Kakanj, kako bi se provjerilo da li su sve procedure usklađene sa zahtjevima standarda ISO 9001:2008.

Nadzorni audit je potvrdio da je Općina Kakanj efektivno primijenila planirani sistem upravljanja, da je sistem upravljanja sposoban ostvariti ciljeve i politiku organizacije i te da je u skladu sa zahtjevima standarda.

Podsjetimo, SGS je dodijelio Općini Kakanj certifikat ISO 9001:2008 za aktivnost "Realizacija lokalne uprave i samouprave". Certifikat važi do 26. jula 2014. godine i ostaje na snazi pod uslovom zadovoljavajućih rezultata nadzornih audita.

Dobijanje certifikata i potvrda nadzornog audita da se poštuje standard ISO 9001:2008, za Općinu Kakanj predstavlja veliku čast i zadovoljstvo, ali i obavezu da se nastavi putem kontinuiranog poboljšanja kvalitete pružanja usluga građanima općine Kakanj.

Rijedak slučaj velike efikasnosti rada organa vlasti u BiH

Ostvarenje plana 300 %

Od 30. novembra 2012. godine kada je održana konstituirajuća sjednica, Općinsko vijeće Kakanj je održalo 14. sjednica. Brojne tačke dnevnog reda su bile razmatrane, njihova konačna brojka iznosi 265. Programom rada Općinskog vijeća bilo je planirano razmotriti tačke dnevnog reda čiji ukupan zbir iznosi 90 , međutim ostvarenje je gotovo 3 puta veće što govori o velikoj efikasnosti izvršne vlasti, načelnika i službi koji u većini slučajeva predlažu tačke dnevnog reda koje su razmatraju, te o efikasnosti Općinskog vijeća koje je ostvarilo učinak kakav se u našoj zemlji rijetko ostvaruje na svim nivoima vlasti.

Brojka razmatranih planova i programa iznosi 26, usvojeno je 115 odluka, 38 rješenja i 55 zaključaka, razmatrano je 18 informacija i 42 rješenja o imenovanjima, postavljena su 122 vijećnička pitanja, upućeno je 48 inicijativa...

Planovi za budućnost

Novi razvojni projekti

U budućem period nastavljamo intenzivno jačati poduzetništvo, jačati infrastrukturu, realizirati ekološke projekte poput uvođenja sistema integralnog prikupljanja i zbrinjavanja otpada, te širenja mreže daljinskog grijanja, realizirati projekat zamjene rasvjetnih tijela javne rasvjete LED tehnologijom, nastavljamo i pripremati nove poslovne zone, podsticati poljoprivredne proizvođače...

U budućem periodu naše aktivnosti će biti fokusirane i na osnivanje muzeja, galerije i muzičke škole.

Krajnje je vrijeme da grad Kakanj dobije svoj muzej u kojem bi se čuvali arheološki artefakti, etnološko blago, eksponati iz historije razvoja kakanjske industrije, eksponati iz perioda NOAR-a 1941-1945. i Odbrambeno-oslobodilačkog rata 1992-1995...

Gradu je potrebna i galerija za održavanje izložbi likovnih radova.

Javnost zna da je Kakanj poznat po muzičkim talentima, ali, nažalost, naš grad nema muzičku školu. Nadamo se da pri realizacije ove zamisli nećemo nailaziti na barijere i birokratska otežavanja obzirom da je obrazovanje nadležnost kantona.

U 2014. godini planiramo graditi zgradu Općine. Općina Kakanj je jedan od rijetkih organa uprave u BiH koji obavlja aktivnosti u zgradi koja nije u njegovom vlasništvu. Zgrada koju trenutno koriste općinske službe i u kojima se građanima pružaju usluge je vlasništvo RMU Kakanj. Radi se o starom i trošnom objektu koji ne pruža mogućnosti da se u potpunosti odgovori izazovima u pogledu pružanju usluga građanima (prostorije službi nisu dostupne osobama sa posebnim potrebama jer postoje arhitektonske barijere, a nema ni lifta, prostor je skučen, zahtijeva detaljnu i skupu rekonstrukciju izuzev manjeg dijela objekta koji je dograđen prije nekoliko godina).

Izgradnjom nove savremene zgrade Općina Kakanj će biti u poziciji da još više poboljša kvalitet usluga koje pruža građanima.

Sve što radimo i što ćemo raditi u budućem periodu bit će u dosluhu sa građanima jer smo razvili brojne modalitete komuniciranja kako bismo od građana dobili povratne informacije o svim pitanjima koja su od općeg interesa.

Kakanj, decembar 2013. godine

Press služba Općine Kakanj